

BITVRIGVM REGIO.

ANNO ab Orbe condito. 1791. Gomer Gallus deductam in Bituricensium ditionem coloniam, in Vrbe primaria Biturigum constituit, incolis à Noa auo suo Ogygis nomine honoris causa imposito; quod ab incolis postea pro fauore & amore erga fundatorem suo ex Ogygis genere procreatum mutatum est, qui se Bitogyges dixerunt; quod Armenorum lingua, Ogygis posteros significat. Verùm vt consuetudine corrumpi vocabula plerumque solent, dum vt familiaria fiant, aut magis propria, iis aliquid vel adimitur, vel mutatur; ea aut potius Principis (quod facilius crediderim) Biturigum, qui Biturix cognomen habuit, voluntate factum est, vt Bitogyges Ditis, & præcipua Bituricensium Vrbs deinde Bituriges dicta sit. Inter alias autem hæc de re opiniones, vna est eorum, qui Biturim, quasi Biturrim à duabus antiquis turribus, quæ olim in ea Vrbe fuerunt, dictam arbitrantur; vnde Grammatici cuiusdam antiqui tale carmen extat, *Turribus à binis, inde vocor Bituris*. Hæc Iohannes Calamæus in suo de origine Biturigum volumine, vnde hanc tabulam mutuati sumus.

LIMANIA.

LONGitudo totius Regionis (quam ab alimoniis nonnulli Alimaniam, alij verò à pingui vel limoso solo Limaniam dictam putant, (portionemque Auerniæ continet) & quam hic integram ob temporis breuitatem, & vallium, montiumque conglomerationes, sinuosique soli orbiculares flexitudines ostendere, locorumque interualla punctim metiri nequiuimus) à ponte veteris Briuatæ Ganatum vsque (frugibus, vino, melle, pecudibus, iumentis, croco, nucibus, oleribus, pascuis, nemoribus, fontibus, fluminibus, balneis, bitumine, lacubus, argentifodinis, familiis insignibus, locis munitis, mercimoniisque refertæ) leucarum circiter 20, latitudo verò ferè 8. At nos feraciorem, cultioremque duntaxat sequuti partem, leucarum longitudinem paulominus 8, latitudinem penè 7 complexi sumus, inferiorem hanc collocandis in oppidis & vicis seruantes mensuram. Sic Auctor in Dialogo pio & speculatiuo (vt inscriptio habet) Italicè à se scripto, vbi hæc tabula videri licet.